

## AUGLÝSING

### ríkisskattstjóra nr. 5/2001 um reiknað endurgjald, viðmiðunarlaun vegna staðgreiðslu árið 2001.

**Viðmiðunarreglur um reiknað endurgjald manna, sem vinna við eigin atvinnurekstur eða sjálfstæða starfsemi, eða starfa hjá sameignarfélagi eða hlutafélagi, sem þeir tengjast vegna eignaraðildar eða stjórnaraðildar.**

#### *Almennt.*

Samkvæmt 2. mgr. 1. tölul. A-liðs 7. gr. laga nr. 75/1981 um tekjuskatt og eignarskatt skal maður, sem starfar við eigin atvinnurekstur eða sjálfstæða starfsemi reikna sér til tekna eigi lægra endurgjald fyrir starfið en hann hefði sem laun fyrir það hjá óskyldum eða ótengdum aðila. Sama gildir um vinnu manns við atvinnurekstur eða starfsemi sem er á vegum sameignarfélags, hlutafélags eða annars félags sem viðkomandi á aðild að. Á sama hátt skal ákveða endurgjald fyrir starf sem maki manns eða barn hans innir af hendi fyrir framan- greinda aðila.

Samkvæmt ákvæðum 6. gr. laga nr. 45/1987 um staðgreiðslu opinberra gjalda ákveður ríkisskattstjóri lágmark endurgjalds, sem reikna skal skv. 2. mgr. 1. tölul. A-liðs 7. gr. laga nr. 75/1981, með setningu viðmiðunarreglna. Þessu lágmarki skal hann breyta á staðgreiðsluári ef þróun launa og tekna í viðkomandi starfsgrein gefur tilefni til þess.

Viðmiðunarreglur þessar gilda um lágmarkslaun vegna staðgreiðslu hjá þeim, sem starfar við eigin atvinnurekstur eða sjálfstæða starfsemi eða starfsemi sem er rekin í sameign með öðrum manni. Viðmiðunarreglurnar gilda einnig um lágmarkslaun vegna staðgreiðslu manns sem starfar hjá lögaðila, sameignarfélagi, hlutafélagi eða öðru félagi, sem hann er tengdur vegna eignar- eða stjórnaraðildar. Teljast slík tengsl vera fyrir hendi ef viðkomandi starfsmaður, fjölskyldumeðlimir hans eða aðrir honum nátengdir eiga verulegan hlut í félaginu og/eða eru í stjórn þess.

#### *Greinargerð um reiknað endurgjald o.fl.*

Reiknuðu endurgjaldi þeirra, sem starfa við eigin atvinnurekstur eða sjálfstæða starfsemi, hefur verið breytt frá því sem var á síðustu greinargerð þeirra til samræmis við viðmiðunarlaunin. Þeir framteljendur sem ekki gera athugasemdir við þessar breytingar á milli ára þurfa ekki að tilkynna það sérstaklega til skattstjóra. Framteljandi sem telur að breytingar verði á högum hans á árinu 2001 sem hafi áhrif á forsendur þess hvernig reiknað endurgjald hans er ákvarðað þarf hins vegar að senda skattstjóra nýja „Greinargerð um reiknað endurgjald“, RSK 5.11.

Félagi og öðrum launagreiðenda, sem greiðir manni sem fellur undir reglur þessar laun, ber að haga staðgreiðslu af launum hans í samræmi við þær.

Ef reiknað endurgjald af starfsemi er það lágt samkvæmt áætlun framteljanda að staðgreiðsla hans sjálfs eða vegna hans og maka hans verður engin á árinu 2001 er honum heimilt að sækja um til skattstjóra að skila „Skilagrein vegna reiknaðs endurgjalds“ einu sinni á ári (sbr. F-lið á eyðublaðinu „Greinargerð um reiknað endurgjald“). Samþykki skattstjóri beiðnina verður framteljandinn að leggja inn til hans skattkort sitt og maka síns sem tryggingu fyrir rétttri nýtingu persónuafsláttar. Þeir framteljendur sem höfðu á árinu 2000 samþykki skattstjóra fyrir að gera skil á staðgreiðslu einu sinni á ári, þurfa að athuga sérstaklega hvort skil

yrðum fyrir ársskilum 2001 sé fullnægt. Þetta þarf að athuga í ljósi breytinga á skatthlutfalli í staðgreiðslu og persónuafslætti.

Þegar umfang starfsemi er ekki meira en svo að reiknað endurgjald vegna starfseminnar er innan við 179.427 kr. á árinu 2001 fellur það utan staðgreiðslu. Aðili, sem er með reiknað endurgjald innan við framangreinda fjárhæð á ári, þarf ekki að senda skattstjóra „Greinargerð um reiknað endurgjald“, RSK 5.11. Hins vegar skal gera grein fyrir reiknuðu endurgjaldi á skattframtali 2002.

Skattstjóri fer yfir skilagreinar manna og félaga vegna reiknaðs endurgjalds. Telji skattstjóri að reiknað endurgjald manns sé lægra en laun sem ætla má að hann hefði borið úr býtum ef hann hefði unnið sambærilegt starf sem launamaður hjá óskyldum aðila skal skattstjóri ákvarða honum endurgjald fyrir starfið með hliðsjón af viðmiðunarreglum ríkisskattstjóra. Endurgjald, sem skattstjóri hefur ákveðið þannig, sætir endurskoðun ef sýnt er fram á það með skriflegum skýringum og nauðsynlegum gögnum að tilefni sé til þess.

Athugasemdir vegna breytinga á reiknuðu endurgjaldi ársins 2001 þurfa að hafa borist skattstjóra eigi síðar en 21. janúar 2001.

### Viðmiðunarlaun 2001.

Ríkisskattstjóri hefur ákveðið viðmiðunarlaun fyrir staðgreiðslu vegna starfa á árinu 2001 sem hér segir:

#### Flokkur A. Sérfræðingar.

Sérmenntaðir menn sem vinna við eigin atvinnurekstur eða sjálfstæða starfsemi í sérgrein sinni eða starfa hjá hliðstæðu félagi sem þeir hafa verulega eignar- eða stjórnaraðild að.

A(1) Lyfjafræðingar, lækna, tannlækna, lögfræðingar, löggiltir endurskoðendur, ráðgjafar, verkfræðingar og aðrir sérfræðingar, sem hafa sérfræðinga í þjónustu sinni eða stjórna hliðstæðu félagi.

Mánaðarlaun	430.000 kr.
Árslaun	5.160.000 kr.

A(2) Lyfjafræðingar, lækna, tannlækna, lögfræðingar, löggiltir endurskoðendur, ráðgjafar, verkfræðingar og aðrir sérfræðingar, sem hafa einungis ósérfróða starfsmenn í þjónustu sinni, sem ekki eru sérfræðingar eða stjórna hliðstæðu félagi.

Mánaðarlaun	410.000 kr.
Árslaun	4.920.000 kr.

A(3) Sérmenntaðir menn sem vinna við eigin atvinnurekstur eða sjálfstæða starfsemi í sérgrein sinni, t.d. lyfjafræðingar, lækna, tannlækna, lögfræðingar, löggiltir endurskoðendur, ráðgjafar, verkfræðingar o.fl., sem hafa ekki starfsmenn í þjónustu sinni eða starfa einir hjá hliðstæðu félagi.

Mánaðarlaun	330.000 kr.
Árslaun	3.960.000 kr.

#### Flokkar B og C. Ýmis starfsemi, stjórnendur o.fl.

Stjórnendur og aðrir sem starfa við eigin atvinnurekstur eða sjálfstæða starfsemi í iðnaðar- og iðjurekstri, hvers konar verslun, útgerð, verktakastarfsemi og persónulegri þjónustu eða starfa hjá hliðstæðu félagi sem þeir hafa verulega eignar- eða stjórnaraðild að.

B(1) Stjórnendur einkafyrirtækja og félaga sem greiða laun sem samsvara árslaunum 10 starfsmanna eða fleiri eða eru með sambærileg umsvif í rekstri.

Mánaðarlaun	410.000 kr.
Árslaun	4.920.000 kr.

B(2) Stjórnendur einkafyrirtækja og félaga sem greiða laun sem samsvara árslaunum 4 til 10 starfsmanna eða eru með sambærileg umsvif í rekstri.

Mánaðarlaun	340.000 kr.
Árslaun	4.080.000 kr.

C(1) Stjórnendur einkafyrirtækja og félaga sem greiðir laun sem samsvara árslaunum 2 til 4 starfsmanna eða eru með sambærileg umsvif í rekstri.

Mánaðarlaun	250.000 kr.
Árslaun	3.000.000 kr.

C(2) Stjórnendur og aðrir starfsmenn einkafyrirtækja og félaga sem greiðir laun sem samsvara minna en árslaunum 2 starfsmanna.

Mánaðarlaun	200.000 kr.
Árslaun	2.400.000 kr.

#### **Flokkur D. Iðnaðarmenn.**

Iðnaðarmenn í löggiltum iðngreinum, sem vinna við iðn sína og eftir atvikum stjórna mönnum í slíkri vinnu eða starfa hjá sambærilegu félagi sem þeir hafa verulega eignar- eða stjórnaraðild að. Ef stjórnun er aðalþáttur í starfinu skal miða reiknað endurgjald við flokka B(1), B(2) eða C(1) hér að framan.

D(1) Iðnaðarmenn, sem hafa iðnlærða menn eða tvo eða fleiri ófaglærða aðstoðarmenn í þjónustu sinni.

Mánaðarlaun	200.000 kr.
Árslaun	2.400.000 kr.

D(2 og 3) Iðnaðarmenn, sem starfa einir eða með einum ófaglærðum aðstoðarmanni í iðngrein.

Mánaðarlaun	175.000 kr.
Árslaun	2.100.000 kr.

#### **Flokkur E. Ýmis starfsemi, einyrkja.**

Menn sem vinna einir við eigin atvinnurekstur eða sjálfstæða starfsemi eða hjá félagi sem þeir hafa verulega eignar- eða stjórnaraðild að og sem ekki fellur undir flokka A til D.

Bifreiðastjórar, hreingerningamenn, stjórnendur vinnuvéla o.fl.

Mánaðarlaun	140.000 kr.
Árslaun	1.680.000 kr.

#### **Flokkur F. Sjómenn.**

Sjómenn, sem starfa sem skipverjar við eigin útgerð, eða starfa hjá útgerðarfélagi sem þeir hafa verulega eignar- eða stjórnaraðild að.

F(1) Skipstjórar, 1. stýrimaður og 1. vélstjóri.

Mánaðarlaun	250.000 kr.
Árslaun	3.000.000 kr.

F(2) 2. og 3. vélstjóri, matsveinn og bátsmaður.

Mánaðarlaun	225.000 kr.
Árslaun	2.700.000 kr.

F(3) Hásetar og sjómenn á bátum undir 12 tonnum.

Mánaðarlaun	175.000 kr.
Árslaun	2.100.000 kr.

### **Flokkur G. Bændur og makar þeirra.**

Bóndi sem stendur fyrir búrekstri með eða án aðkeypts vinnuafls eða starfar að búrekstri hjá félagi sem hann hefur verulega eignar- eða stjórnaraðild að. Nái bústofn á býli ekki 420 ærgildum má lækka reiknað endurgjald í hlutfalli við bústærðina. Sé starfið einungis að hluta til við búrekstur skal ákveða viðmiðunarlaunin hlutfallslega.

G(1) Bóndi með sauðfjárrækt sem aðalbúgrein og hefur meiri hluta bútekna af henni.

G(2) Maki bónda, sbr. G(1), sem stendur fyrir búrekstri með honum.

Mánaðarlaun	70.000 kr.
Árslaun	840.000 kr.

G(3) Bóndi með annað en sauðfjárrækt að aðalbúgrein.

G(4) Maki bónda, sbr. G(3), sem stendur fyrir búrekstri með honum.

Mánaðarlaun	90.000 kr.
Árslaun	1.080.000 kr.

### **Flokkur H. Makar.**

Maki manns með eigin atvinnurekstur eða sjálfstæða starfsemi, sem starfar með honum að atvinnurekstrinum eða starfar hjá félagi sem makinn hefur verulega eignar- eða stjórnunaraðild að.

H(1) Sérfræðingar, sbr. flokk A, sem vinna í sérgrein sinni.

Mánaðarlaun	275.000 kr.
Árslaun	3.300.000 kr.

H(2) Iðnaðarmenn, sbr. flokk D, sem vinna í iðngrein sinni.

Mánaðarlaun	145.000 kr.
Árslaun	1.800.000 kr.

H(3) Ófaglærðir starfsmenn.

Mánaðarlaun	90.000 kr.
Árslaun	1.080.000 kr.

*Reykjavík, 8. janúar 2001.*

**Indriði H. Þorláksson** ríkisskattstjóri.